

# Lugwasyo Luzwa Ku-julu

AKALEMBWA A WATSON GOODMAN

TAKASAMBALWI NKAKUPA BUYO

# LUGWASYO LUZWA KU-JULU

"LUGWASYO LUZWA KU-JULU" makani akabikwa amwi kuzwa muzibela zyandene zya-Bbaibele. Ndisyoma kuti kupa ndulula kubotu kuzwa mu-Ibbaibele.

Ijwi lya-Leza "lizwa kujulu" alimwi liyanda kugwasya myoyo ifwa nzala alimwi anyota yabululami. Muntu asanduka, ulasiva cibi, ulatamba Mwami Jesu Kristo kuti akalile mumoyo wakwe, alimwi ulasyoma amoyo wakwe oonse mumwami Jesu Kristo Mufutuli. Mwami ulalitondezva kuli nguwe alimwi ulapa lutangalo lwakwe alumuno mumoyo wamusyomi. Ndakasanduka mumwaka wa-1937, alimwi nsina tvola luswangano a mwami kuzwa elvo. Ndamulomba kuti mulipede kulinguwe ngo-mufutuli alimwi ngo mwami, kuti natonacita obo. —Watson Goodman (1920-2002)

### Ba-Roma 5:8

Pele Leza, walo ulatondezya luyandisyo lwakwe kulindiswe boobo, nkaambo nitwakacili basizibi Kristo wakatufwida.

# Jeremiya 31:3

Jehova wakalibonya kuzwa kule, wati, Ndakuyandisya aluyando lutamani, aboobo nsina kuleka kukufwida luzyalo.

# Johane 3:16

Nkaambo obuya Leza mbwaakayandisya nyika, wakapa Mwanaakwe simuzyalwa alike, kuti umwi umwi yoma atafwidilili, pele abe abuumi ubutamani. Johane 13:1

Eno ipobwe lya-Pasika nelyatakalinacitwa, Jesu mbwaali kuzi kuti ciindi cakwe casika kuti azwe munyika eyi aye kuli-Wisi, mbwaakali kubayanda bana bakwe abali munyika ino, wakabayanda mane kusikila kumamanino.

# Ciyubunuzyo 1:5

Akuzwa kuli-Jesu Kristo, ngukamboni uusyomeka, iwakasaanguna kuzyalwa kuzwa kubafu, alimwi ngumweendelezi wabami banyika. Kulinguwe iwakatuyanda, akutusanzya kuzibi zyesu mubulowa bwakwe mwini.

#### 1 Timoteo 3:16

Ncobeni takukwe uukonzya kukazya kuti makani aasisidwe aabukombi mapati loko. Oyo uwakabonwa mumubili wabuntu, Uwakalondomezegwa mumuuya, Uwakabonwa kubaangelo, Uli amakani mabotu aakakambaukwa kumasi oonse, Uwakazuminwa ansi ano, Uwakatanta kujulu mubulemu.

### Johane 14:9, 10a

Jesu wakamwaambila kuti, Cakomenesya buti ciindi ncotwakali ayebo, Filipo, tonandiziba asunu na? Oyo uwandibona, wamubona awalo Taata, eno uambilanzi kuti, Tubonye Uso? Sena tosyomi kuti mebo ndili muli-Taata, awalo Taata uli mulindime? . . .

### Johane 1:1, 14

Kumatalikilo Ijwi wakaliko awalo Ijwi wakali antoomwe a-Leza, eno Ijwi oyo wakali Leza. . . . . Awalo Ijwi wakalifungula waba mubili wabuntu uwakakalakala akati kesu, uwakazywide luzyalo abwini, aswebo twakeebela bulemu bwakwe, bulemu ububa anga mbwa-Mwana uuzyalwa alike kuli-Wisi.

# Matayo 1:22, 23

Lino aya oonse akaba kuti acitwe ngaakaamba Jehova kumusinsimi kuti, Amubone. Oyu musi-

muulika izina lya-Emanuele, nkukwaamba kuti, Leza uli aswe.

# JESU MWANA WA-LEZA

Luka 1:35

Angelo wakumuvuwa kuti, Muuya Uusalala uzooza alinduwe, enguzu zya-Sijulu lyamajulu zikuvunikile, ayooyo Uusalala uti tumbukwe uzooambwa kuti Mwana a-Leza.

Isaya 9:6

Nkaambo iswe twazyalilwa mwana, twapegwa mwana mulombe. Bweendelezi buyookala azifunzi zyakwe. Nkabela izina lyakwe liyooambwa kuti, Sinkuta uugambya, Leza Singuzu, Tateesu Uuteeli, Mwami waluumuno.

Matayo 17:5

Elyo naakacili kwaamba, kwakabavumba ikumbi lituba, nkabela mpawo mwakazwa ijwi mukumbi liti, Ngooyu mwanaangu uuyandwa ngwinkondelwa, amuswiilile nguwe.

Ba-Kolose 2:9

Nkaambo muli-Kristo mubukede bu-Leza boonse buzulide camubili.

Matayo 3:17

Lino kwakazwa ijwi kujulu, lyakati, Ngooyu mwanaangu uuyandika ngunkondelwa.

3

#### Johane 9:5

Nencili munyika ndi mumuni wanyika.

### Johane 8:58

Jesu wakabaambila kuti, Ncobeni ndamwaambila kasimpe, Abrahamu katanazyalwa mebo mpendi.

### Johane 10:7

Nkaambo kaako Jesu wakabaambila alimwi kuti, Ncobeni ndamwaambila kasimpe, Ndime cilyango cambelele.

# Johane 13:13

Mundyaamba kuti, Mufundisi, akuti, Mwami. Mwaamba kabotu, nkaambo mbwembede.

### Johane 11:25

Jesu wakamwaambila kuti, Ndime kubuka abuumi. Oyo uusyoma ndime, naanooli wakafwa, unooli muumi.

# Johane 6:35

Jesu wakabaambila kuti, Ndime insima yabuumi, oyo uuza kulindime takooyoofwa nzala, awalo uundisyoma takooyoofwa limbi nyota.

### Johane 8:23

Wakabaambila kuti, Nywebo muli baansi, mebo ndili wakujulu, nywebo muli benyika ino, mebo nsili wenyika ino pe. Matavo 20:30, 34

Nkabela kakuli boofu bobile ibakakede kumbali anzila. Bamvwe kuti Jesu uli mukwiinda, bakoongolola bati, Mwami, mwana a-Davida, tufwide luzyalo...Lino Jesu wakabafwida luzyalo, waampa meso aabo. Nkabela ndilyonya bakabononona, elyo bakamutobela.

### Matavo 14:19-21

Lino wakalailila bantu kuti bakale amweemvwe. Mpawo wakabweza eyo mikamu yosanwe answi ezyo zyobile, walungama kujulu, walumba, waikomona mikamu, waabila basikwiiya bakwe, nkabela basikwiiya bakaabila bantu. Lino bakalya boonse, bakuta. Alimwi bakazuzya insuwo zili ikumi azibili bufwefwelenga ibwakasyeede. Abo ibakalya kabali zyuulu zyosanwe, kutabala banakazi abana.

### Luka 5:4-6

Naakamana kukambauka, wakati kuli-Simoni, Katuya akati kamulungu, munike nsabwe zyanu, mukajaye nswi. Simoni wakamuvuwa kuti, Omwami, twali kuzuba masiku oonse, tatujene cintu, nokubaboobo kujwi lyako ndiyoonika nsabwe. Nobakacita obo, bakajaya nswi zinjizinji, mane zyati kazapuke nsabwe zyabo.

# JESU KRISTO NGOMULENGI ALIMWI NGO-MWAMI

# Ba-Hebrayo 1:2

Leza. . . pele kumamanino, sunu, cino ciindi watwaambila mu-Mwanaakwe, ngwaakasala kuti abe ngomukamwini wazintu zyoonse, alimwi kulinguwe wakaanza zintu zyoonse.

### Ba-Roma 14:9

Nkaambo nciconya Kristo ncaakafwida akubuka akupononona, kuti akabe Mwami waboonse, abaumi abafu.

### Ba-Kolose 1:16

Nkaambo mulinguwe muzyakalengwa zintu zyoonse, zyamujulu azyaansi, zintu zibonwa azitabonwi, zyuuno zyabwami, bami, beendelezi abasinguzu, zyoonse buyo zyakalengwa anguwe kuti zibe zyakwe.

### Johane 1:3

Zyoonse zintu nkozyakaanzwa kulinguwe, kuti naatali nguwe nokutakwe ecomwe icakaanzwa.

# 1 Ba-Korinto 1:9

Wasyomeka Leza, oyo iwakamwiitila muciinga ca-Mwanaakwe Jesu Kristo Mwami wesu.

### Incito 2:36

Aboobo inanda yoonse ya-Israyeli izibisye kuti oyu Jesu nguwenya ngomwakabambula, Leza wamucita abe Mwami a-Kristo.

# JESU KRISTO NGOMUBETESI WABOONSE

#### Johane 5:22

Nkaambo Wisi tabeteki muntu, pele wakapa lubeteko loonse ku-Mwana.

### Ba-Roma 14:10

Pele webo ubetekelanzi munyoko? alimwi webo usampaulilanzi munyoko? nkaambo toonse tuleelede kwiima kubetekelo lya-Leza.

# Matayo 25:32

Nkabela misyobo yoonse izoobunganisigwa kubusyu bwakwe. Mpawo uzoobaandaanya mbuli mweembeli mbwaandaanya imbelele ampongo.

#### Ba-Roma 2:16

Mubuzuba obo mbwazoobeteka Leza makani aasisidwe aabantu muli-Jesu Kristo, mbuli Makani Mabotu nginkambauka meho.

# Incito 10:42

Elyo wakatulailila kuti tukambaukile bantu, tulungulule kuti ngonguwe uwakabikwa Leza kuti abe mubetesi wabaumi abafwide.

# 2 Timoteo 4:1

Ndakulailila kunembo lya-Leza alya-Kristo Jesu uuyoobeteka baumi abakafwa, akukupompa kwakwe akubwami bwakwe.

# LUFUTUKO KWIINDA MULI KRISTO

Johane 14:6

Jesu wakamwaambila kuti, Ndime nzila, ndime bwini, ndime buumi. Takukwe uuza kuli-Taata, pele mulindime.

Johane 8:24

Ncendakamwaambila kuti, Muyoofwa muzibi zyanu, nkaambo mwatazumina kuti ndime yooyo, muyoofwa muzibi zyanu.

Ba-Hebrayo 5:9

Eno mbwaakalondoka obo, wakaba sikubacitila lufutuko lutamani boonse abo abamumywa.

Johane 10:9

Ndime cilyango, mulindime muntu woonse uunjila, ulafutuka, ulanjila akuzwa, ulajana macelelo. Ba-Galativa 3:13

Lino Kristo wakatunununa kuzwa kulutuko lwa-Mulao, ikuti walo mwini wakaba lutuko nkaambo kesu, nkaambo kulilembedwe kuti, Uli alutuko umwi aumwi uuangilidwe kumusamu.

Ba-Hebrayo 7:25

Nkaambo kaako, walo uli anguzu zitamani zyakubafutula abo abaswena kuli-Leza kujanza lyakwe, nkaambo lyoonse buyo mpali, ulabakombelezya.

Incito 4:12

Takukwe lufutuko kuluumbi naba omwe pe, nkaambo takukwe zina limbi ansi ilipegwa bantu, ndotweelede kufutulwa andilyo.

# LUFUTUKO KWIINDA MULI KRISTO

#### Ba-Kolose 1:12-14

Amukalumbe Taateesu nkaambo wakatucita kuti tweelelwe kuba acaabilo calukono lwabasalali bali mumumuni. Nguwenya Taateesu iwakatufutula kuzwa kunguzu zyamudima akutunjizya mu-Bwami bwa-Mwanaakwe uu-yandwa. Mumwanaakwe oyo mutujene lununuko abulekelelo bwazibi.

# Civubunuzyo 5:9

Mpawo bakaimba lwiimbo lupya lwakuti, Nduwe uuelede kubweza ibbuku, Akunamatula zinamatizyo zyalyo. Nkaambo nduwe wakayaswa akutufutula kuli-Leza abulowa bwako. Swebo to-

bantu bamisyobo yoonse amilaka yoonse amikowa yoonse, azisi zyoonse.

### Luka 19:10

Nkaambo Mwana a-Muntu wakaboola kulangaula akufutula abasweekede.

### Ba-Roma 3:24

Pele balalulamikwa buyo kuluzyalo lwakwe kubununu bwamuli-Jesu Kristo.

#### Tito 2:14

Nguwenya wakalyaaba nkaambo kesu, kuti atununune kuzibi zyoonse akulisalazizya bantu kuba banakwakwe, balisanga kumana milimo mibotu.

### Ba-Roma 5:9

Nkabela lino mbutwalulamikwa kubulowa bwakwe, mulinguwe alimwi mututi inde loko kufutulwa kubukali.

### 1 Johane 1:7

Pele na tuleenda mumumuni, mbubonya alakwe mbwali mumumuni, tulijisi luswanaano umwi aumwi, alimwi bulowa bwa-Jesu Kristo Mwana wakwe bulatusalazva kuzibi zvoonse.

# Ba-Hebrayo 9:14

Sena inga bwalo bulowa bwa-Kristo, uwakalituula mwini kuli-Leza mu-Muuya Uutamani mbuli cipaizvo citakwe kampenda, tabukooinda kusalazya meezeezyo aanu akumugwisizya milimo mifu, kuti mumumanine milimo Leza muumi?

#### Matavo 26:28

Nkaambo mboobu bulowa bwangu bwamulongo butililwa bantu banii kuti balekelelwa milandu vabo.

### 1 Petro 1:18, 19

Nkaambo mulizi kuti teensi zintu zikulumpala, mbuli insiliva niiba ingolida, nzimwakanunuzigwa kukweenda kwanu kwabuyo nkumwakasiilwa kumauso, pe, mwakanunuzigwa abulowa buyandisi mbuli bwamwanambelele uutajisi akampenda nanka kabala, nkokuti bulowa bwa-Kristo.

# LUFUTUKO KWIINDA MULUSYOMO LWA-KRISTO

Ba-Efeso 2:8, 9

Nkaambo kakuti luzyalo ndolumufutisizye nkaambo kalusyomo, nkabela makani taazwi kulindinywe nubeni, ncipo buyo cizwa kuli-Leza. Teensi makani aancito zyesu, pe, kuti kutabi muntu uulikankaizya.

Ba-Roma 5:1

Lino mbuli mbutululamikwa kulusyomo, atube aluumuno a-Leza muli-Jesu Kristo Mwami wesu.

Johane 20:31

Anu ezi zyakalembwa kuti mukasyome kuti Jesu ngu-Kristo, Mwana a-Leza, akuti kukusyoma mukabe abuumi muzina lyakwe. Ba-Galatiya 5:6

Nkaambo muli-Kristo Jesu bupalule tabukwe milimo, alwalo lulomo talukwe milimo, pele lusyomo lubeleka kujanza lyaluyandano ndolujisi milimo.

1 Johane 5:4

Coonse cili buti cizyedwe kuli-Leza cilazunda nyika, nkabela luzundo luzunda nyika ndoolu, ndusvomo lwesu.

Johane 6:28, 29

Bakamwaambila kuti, Tucite buti kuti tubeleke milimo ya-Leza? Jesu wakavuwa wakati, Ngooyu mulimo wa-Leza, kuti mumusyome oyo ngwaakatuma.

### LUSE LWA-LEZA

#### Tito 3:5

Teensi kwaamba kuti nkaambo kamilimo yabululami njotwakacita swebo, pele nkaambo kalweetelelo lwakwe mwini, ncakatufutula, kukusanzigwa kwakakuzyalwa kwabili akubuumi bupya buzwa ku-Muuya Uusalala.

#### Mika 7:18

Nguni Leza uuli mbuli nduwe nojatila zibi akulekelela milandu yabantu bako basyeede? Takakatili lyoonse bukali bwakwe, nkaambo luzyalo ndolumubotela.

### Malilo 3:22, 23

Ndoluzyalo lwa-Jehova lutukasya kunyonyooka, nkaambo buuya bwakwe tabumani. Bulabukuluka cifumo coonse; lusyomo lwako ndupati.

# Intembauzyo 103:11

Nkaambo ijulu mbulili idamfu kwiinda nyika, Mbubonya obo mbulukomede luzyalo lwakwe kulibaabo bamuyoowa.

### Intembauzyo 103:17

Pele luzyalo lwa-Jehova mpoluli lyoonse kulibaabo bamuyoowa, Abululami bwakwe bulaboneka akubazukulu besu.

## Intembauzyo 108:4

Nkaambo luzyalo lwako ndupati, lulasika akujulu; Busyomeki bwako bulasika akumayoba.

# LEZA ULATUTAMBA KULI NGUWE

### 2 Ba-Korinto 5:20

Lino tuli bangambela ba-Kristo nkukuti Leza ulamukumbila kumaanza esu. Tulamukombelezya muzina lya-Kristo kuti, Amuyanzanye a-Leza.

### Ciyubunuzyo 22:17

Lino Muuya anabwiinga balaamba kuti, Boola. Ayooyo uuswiilila alakwe aambe kuti, Boola. Ayooyo uufwide nyota aboole. Amuntu woonse uuyanda anywe cabuyo maanzi aabuumi.

# Johane 7:37

Eno kubuzuba bwakusyaalila, buzuba obo bupati bwepobwe, Jesu wakaima, wakoompolola kuti, Kwanooli muntu uufwa nyota, aze kulindime anywe.

# Isaya 55:1

Nyoonse nimufwa nyota, amuboole kumaanzi. Alakwe oyo uubula mali aze. Amuboole, muule, mulye. Amuboole, muule waini amalili. Zyoonse tazyuulwi mali, tazijisi muulo pe.

### Isaya 1:18

Amuboole, tubuzyanye makani, mbwaamba Jehova. Nekuba kuti zibi zyanu zyasalala pyu, ziyootuba buu mbuli lukobo. Nekuba kuti zili mbuli zisani zisalalisya ziyooba mbuli boya bwambelele.

### Johane 1:12

14

Ino boonse abamuzumina, nkokuti abasyoma zina lyakwe, wabaabila nguzu zyakusanduka akuba bana ba-Leza.

### 1 Johane 3:10

Lino bana ba-Leza abana ba-Saatani balazibwa boobu. Umwi aumwi uutaciti bululami tali wa-Leza, naba oyo uutayanda mweenzinyina.

# Ba-Filipi 2:15

Kuti mube bantu batakwe mulandu, bantu benibeni, bana ba-Leza baluzi batakwe kampenda, mukati kabantu bapilingene baleede bamuzukulu uno, Akati kabaaba mulaba mbuli mimuni yakumunika ansi.

### Johane 12:36a

Nomucijisi mumuni amusyome mumuni, kuti muzoobe bana bamumuni...

# Ba-Roma 8:14, 15

Nkaambo boonse beenzegwa ku-Muuya wa-Leza mbabonya mbibana ba-Leza. Nkaambo teemwatambula muuya wabuzike buboozezya buyoofu pe, mwatambula muuya wabwana, mulinguwo mutuompolola kuti, Abba, Ta.

# LEZA UWAAMBA KUTINZI AKUKOLWA

# Tusimpi 23:31, 32

Utalangi waini ciindi naasalala, Naanjoloma munkomeki, Naatelemuka kabotu. Kumamanino ulaluma mbuli inzoka, Ulazapula mbuli cipile.

### Isava 5:11

Maawe kulibaabo bafuma cifumo kuti batobele bukoko, alimwi balamuka kuleka mangolezya mane bukoko bwabakola.

# Ba-Roma 13:13, 14

Atweende muciyanza ceelede, mbuli kuciindi casikati. Tuteendi anjalalando ankolwi, abuvuule azisusi zibi, abulwani abbivwe. Pele amulisamike ziyanza zya-Mwami Jesu Kristo, alimwi mutayeeyi kucita zisusi zyanyama.

# Ba-Galatiya 5:19-21

Lino milimo yanyama ilibwenekede, njeeyi: — bwaamu, busofwaazi, zisusi zibi, kukomba mituni, bulozi, inkondo, bulwani, lukazyanyo, inyemo, insulano, mipampo mipampo, impilingano, ibbivwe, inkolwi, injalalando, azimwi zili boobo. Lino ndamwaambila aazintu ezi mbubonya mbundakamwaambila kale, kuti abo bacitaula zintu zili boobo tabakooyookona Bwami bwa-Leza.

Matayo 22:37, 38

Wakamwaambila kuti, Yanda Leza Jehova wako amoyo wako woonse, amoya wako woonse, amumiyeeyo yako yoonse. Ngooyu mulazyo mutaanzi mupati.

### Marko 10:17-22

Mufundisi mubotu, ino nkacite buti kuti nkajane buumi butamani? Elyo Jesu wakamwaambila kuti, Ino undaambilianzi kuti omubotu? Taakwe muntu mubotu, pele Leza alike ngumubotu. Ulizi milazyo, iiti, Utajayi, Utaciti bumambi, Utabbi, Utapi muntu kaambo cakubeja, Utalidi beenzinyoko, Kolemeka uso aba-

nyoko. Lino walo wakamwaambila kuti, Mufundisi, ava oonse nsikwe nendakaaluba kuzwa kubwana bwangu. Mpawo Jesu amuzilikizve buyo, akumuvanda wamuyanda, wamwaambila kuti, Alo mpocili comwe ncotaiisi. Nceeci. Kova ukauzve zvoonse nzvojisi. ukape bacete, noti jane lubono kuiulu, alimwi uboole, ucilile ndime. Amvwe buyo majwi aya, wakasutana kubusyu, wakainka abuusu, nkaambo wakali alubono lunii.

# Tusimpi 16:25

Kuli inzila iiluleme mumeso aabantu, Pele mamanino aayo ninzila zyalufu.

# 1 Johane 3:7, 8a

Nobana bangu, kutabi muntu uumweena. Oyo uucita bululami mululami, mbuli mbwali mululami alakwe. Oyo uucita zibi nguwa-Saatani, nkaambo Saatani wakabisya kuzwa kumatalikilo.

# 1 Ba-Korinto 6:9, 10

Ma! Sa tamuzi kuti bataluleme tabakonzyi kuyoovuba Bwami bwa-Leza? Mutalyeeni pe. Nibaba basibwaamu nibaba basikukomba mituni nibaba basimamambe nibaba batete kuzibi nibaba baalumi boona baaluminyina nibaba babbi nibaba basikulikumbuzya nibaba bakolwi nibaba basimatu-

si nibaba basilunyanzyo tabakoovooyuba Bwami bwa-Leza.

# Ba-Efeso 5:6

Mutaleki muntu naba omwe kuti amulye lukokobele amajwi aabuyo, ikuti nkaambo kankani ezi nkibuzida bukali bwa-Leza abana batamywi.

### Jakobo 1:22

Pele amube basikucita makani, mutabi basikuswiilila buyo balyeena.

# Ba-Galatiya 6:3

Na muntu ulayeeya kuti, Ndi mulemu, anukuti tajisi bulemu abuniini, oyo muntu ulalyeena. Tusimpi 11:19

Uuimywi nji mubululami ulajana buumi, Pele uutobela bubi bulamutola kulufu.

#### Jakobo 1:15

Eno zisusi zyamita buyo, zilazyala zibi, azyalo zibi zyakomena zilatumbuka lufu.

### Luka 15:32

Twaleclede kusekelela akubotelwa, nkaambo oyu mwanikaako wakalifwide, sunu wapona, wakalisweekede, sunu wabonwa.

# Ba-Roma 8:6, 7

Ikuti miyeeyo yanyama ndufu, anukuti miyeeyo yamuuya mbuumi, alimwi nduumuno. Nkaambo kakuti miyeeyo yanyama ngusinkondonyina Leza, ikuti tiilibombyi ku-Mulao wa-Leza nikuba kukonzya kulibombya.

# Ezekieli 18:20

Muntu uubisya ngonguwe uuyoofwa. Mwana takoolemenwa milandu yawisi, awisi takoolemenwa milandu yamwana. Bululami bwauululeme mbubwakwe mwini uululeme, abubi bwasizibi mbubwakwe mwini uuzicita.

Ba-Roma 5:12

Mbuboobo cibi mbucakanjila munyika kumaanza aamuntu omwe buyo, alwalo lufu nkaambo kacibi, nkabela mbubonya obo lufu mbulwakazida bantu boonse, nkaambo kakuti boonse babisya.

### Johane 10:17, 18

Taata ncandiyandila, nkaambo nditula buumi bwangu, kuti nkabubweze alimwi. Takukwe uundinyanga mbubo, pele ndabutula ndemwini. Ndijisi bwami bwakubutula, alimwi ndijisi bwami bwakububweza. Ngomulao ngwendakatambula kuli-Taata.

Johane 11:43, 44

Naakamana kwaamba obo, wakoompolola ejwi pati kuti, Lazaro, kozwa omo. Mpoonya oyo uwakafwide wakazwa, ulizambaidwe kumaboko akumaulu ezisani zyakuzikwa azyalo, ulaangidwe isila kubusyu. Jesu wakabaambila kuti, Amumwaangunune, mumuleke aende.

# Ciyubunuzyo 1:18

Ndime oyu uupona, nekubaboobo ndakalifwide. Lino amubone, akupona ndapona lyoonse mane kukabe kutamani, nkabela ndijisi zijaluzyo zyalufu azya-Gehena.

# Luka 7:14, 15a

Ndilyonya waswena afwaafwi wajata macila, abakamutembekede baima, wati, Mulombe, ndakwaambila, Buka. Mpoonya awo uwakafwide wakabuka... Deuteronomo 5:7-21 Utabi amizimu imbi kunembo lyangu.

Utalicitili cikozyano cibezedwe, neciba cacintu cili kujulu nanka cili ansi ano nanka cili mumaanzi kunsi anyika. Toelede kuzikotamina nekuba kuzi manina milimo...

Utasampauli izina lya-Jehova Leza wako, nkaambo Jehova ulamupa mulandu uusampaula izina lvakwe.

Utalubi buzuba bwa-Sabata, ubulemye, mbubonya mbwaakakulailila Jehova Leza wako. Mazuba aali musanu abumwi uleelede kubeleka akumana milimo yako yoonse. Pele buzuba bwamusanu aabili mbuzuba bwa-Sabata bwa-Jehoya Leza wako. . .

Lemeka uso abanyoko, mbubonya mbwaakakulailila Jehova Leza wako...

Utajayi, Utaciti bumambi. Utabbi. Utalengeleli mweenzinyokwe kaambo.

Uteemuzyi mwanakazi wamweenzinyokwe, uteemuzyi inanda yamweenzinyokwe, nuuba muunda wakwe, naba muzike wakwe, naba mulanda wakwe musimbi, naba musune wakwe, niiba imbongolo yakwe, neciba cintu cili buti ncajisi.

# TOKOZYI KUYUBA KUZWA KULI-LEZA

#### Luka 8:17

Nkaambo taakwe cisisidwe iciti takasisululwe, taakwe civumbidwe iciti takavumbululwe kuti cibe atuba.

Intembauzyo 139:8, 12

Na ndatanta kujulu, akwalo nkoli. Na ndayala bulo bwangu kubusangu, akwalo nkoli... Ncobeni mudima awalo tuusisi kulinduwe; Masiku alabalangala mbuli isikati, Mudima amumuni ncintu comwe kulinduwe.

Jobu 34:21, 22

Nkaambo meso aa-Leza ali kumuntu; Ulalanga ntaamo zyakwe zyoonse. Taakwe mudima, na cenzule calufu, Babi nkobakonzya kuyuba.

# Tusimpi 15:3

Meso aa-Jehova ali koonse koonse, Alalanga basizibi ababotu boonse.

# Jeremiya 23:24

Sa muntu ulakonzya kuyuba muciyubilo nkuntakonzyi kumubona? mbwaamba Jehova. Sa nsizuzyi nyika ajulu zyoonse? mbwaamba Jehova.

### Incito 17:27

Kayanda kuti bamuyandaule Leza, kuti kukumwaampasya ambweni balamujana, nokubaboobo tali kule kuluumwi umwi wesu.

# CISUBULO CITAMANI KULI BATALI BANA LEZA

### 2 Petro 3:7

Eno ijulu anyika nzitubona sunu zyayobwedwa lubeta, kujwi elyo ndilyonya, ziti kanyonyoonwe amulilo mubuzuba obo mbubayoobetekwa bantu basikasampusampu.

# Intembauzvo 9:17

Basizibi bayoopilusigwa kubusangu, Abamasi oonse baluba Leza.

# Matavo 13:41, 42

Mwana a-Muntu uzootuma baangelo bakwe kuti bazoobunge zintu zyoonse zyamu-Bwami bwakwe zilebya, abalo bacita ziteelede, nkabela bazoobasowela mubbila lyamulilo, oko kuzooba kulila akuluma ntwino.

# Matayo 18:8

Kuti ijanza lyako nanka cituta cako kacikulebya, cikosole ucisowe, nkaambo kulakubotela kuti unjile mubuumi, nikuba kuti koli cilema nanka kotyokede, kwiinda kuwaalwa mumulilo uutazimi nekubaboobo ucili amaanza obile amaulu obile.

### Matayo 25:46

Nkabela aba bayoonjila mumapenzi aatamani, pele balulami bayoonjila mubuumi butamani.

# LUBETEKO LUBOOLA

# Ba-Roma 14:12

Aboobo, toonse buyo tuleelede kulyaambilila makani esu kubusvu bwa-Leza.

### Incito 17:31

Nkaambo wabika buzuba mbwati kabeteke nyika mubululami, kumwaalumi oyo ngwasungwide. Wakabapa bantu boonse cisinizyo camakani ayo mbwaakamubusya kubafu.

# 2 Ba-Korinto 5:10

Nkaambo toonse buyo tuleelede kuboneka kubetekelo lya-Kristo, kuti tukatambule umwi aumwi cakuvola ceelede camilimo yesu njitucita mumibili yesu, niiba mibotu njiba mibi.

#### 2 Petro 2:9

Aboobo tulabona kuti Jehova ulizi kuvuna bamukomba kumasukusyo, akuyobola bataluleme mulukomo mane kusikila kubuzuba bwalubeta.

# 1 Johane 4:17

Lino luyando lwakulindiswe lulalondoka boobu, kuti tukabe akaanzambwene mubuzuba bwalubeta, nkaambo mbuli mbwabede walo, mbubonya mbutubede aswebo ansi ano.

# Ba-Hebrayo 9:27

Lino mbuli mbokubede kuti bantu kabanga kabafwa lweendo lomwe, elyo babetekwe.

### LUSE LWA JESU KRISTO

#### Incito 4:33

Nkabela baapostolo bakali kulungulula canguzu loko makani aabubuke bwa-Mwami Jesu, alimwi luzyalo lupati lwakali abo boonse.

#### Ba-Roma 9:16

Aboobo, teensi makani aanyando zyamuntu naaba aakuwilana, anukuti nga-Leza uuetelela.

# Ba-Roma 5:15

Pele cipo tacili mbubonya mbuli mulandu pe. Nkaambo bantu banji bakafwa nkaambo kamulandu wamuntu omwe buyo, pele luzyalo lwa-Leza lwakainda loko kupaya, acalo cipo camuluzyalo camumuntu omwe Jesu Kristo, kubantu banji.

### 1 Petro 5:5b

...Leza ulabakazya basikulisumpula, Pele batete-myoyo ulabapa luzyalo.

# 2 Ba-Korinto 9:15

Alumbwe Leza nkaambo kacipo cakwe citaambiki!

### 2 Ba-Korinto 8:9

Mulizi mbulubede luzyalo lwa-Mwami wesu Jesu Kristo, nkaambo walo wakali muvubi, nekubaboobo wakaba mucete nkaambo kandinywe, kuti bucete bwakwe bumuletele buvubi nywebo.

### Incito 2:38

Ndilyonya Petro wakabaambila kuti, Amusanduke, mubapatizigwe umwi umwi muzina lya-Jesu Kristo, mujatilwe zibi zyanu, nomwati tambule cipego ca-Muuya Uusalala.

# Incito 3:19

Aboobo amweempe, musanduke, kuti zibi zyanu zijatilwe, kusike ziindi zyakulyookezya izizwa kubusyu bwa-Jehova.

### Ezekieli 18:31

Amusowe zibi zyanu zyoonse nzimwandibisizya. Amusandule myoyo yanu amyuuya yanu ibe mipya! Nkaambonzi mulayanda kufwa, O luzubo lwa-Israyeli?

### Incito 17:30

Ziindi ezyo zyakutaziba Leza wakazileka buyo, kwalo sunu ulailila bantu kuti kumasena oonse boonse basanduke.

### Luka 13:3

Pe, ndamwaambila kuti mwatasanduka muyoofwidilila anywebo nyoonse.

# Matayo 3:2

Wakati, Amweempwe, nkaambo kakuti Bwami bwakujulu buliswenede.

# 2 Ba-Korinto 7:10

Nkaambo buusu buzwa kwa-Leza bulaleta lweempo akucita lufutuko lutalisekwi, anukuti buusu bwaansi bulaleta lufu.

### Isaya 55:7

Sizibi aleke inzila yakwe, asimilandu aleke miyeeyo yakwe. Aboole kuli-Jehova, kuti amufwide luzyalo, akuli-Leza wesu, nkaambo nguuinda kulekelela.

# Ezekieli 18:21

Pele sizibi, na waleka zibi zyakwe zyoonse nzyaakacita, na watalika kubamba imbeta zyangu akubeteka kabotu akucita bululami, ncobeni uyoopona, takooyoofwa pe.

# Matayo 6:14

Nkaambo mwalekelela bantu milandu yabo, alakwe Usowanu uuli kujulu ulamulekelela anywe.

#### Marko 2:5

Lino Jesu naakabona lusyomo lwabo waambila oyo uuyuminide mubili kuti, Mwanaangu, walekelelwa zibi zyako.

# Ciyubunuzyo 3:20

Bona, ndiimvwi kumulyango, ndakonkomona. Na kuli muntu uuswiilila ijwi lyangu akundijulila mulyango, nzoonjila mulinguwe, nkalalile awe, alakwe ambebo.

### Incito 5:31

Oyu, Leza wakamusumpulisya kujanza lyakwe lyalulyo, abe Mwami a-Mufutuli, ape Israyeli kweempa akujatilwa kwazibi.

# KWANDANA KUZWA KUNYIKA

# Isaya 1:16

Amusambe, mulisalazye. Amugwisye bubi bwamilimo yanu kumeso aangu. Amuleke kucita bubi.

### Ba-Kolose 3:2

Amupangike myoyo yanu kuzintu zili kujulu, mutaipangiki kuzintu zyaansi pe.

# 1 Johane 2:15, 16

Mutayandi nyika, neziba zintu zyamunyika. Kuti muntu wayanda nyika, luyando lwa-Taata taluli mulinguwe. Nkaambo zintu zyoonse zili munyika, niziba zisusi zyanyama niziba zisusi zyameso nikuba kulisumpula kwabuumi, tazili zya-Taata, pe, nzyenyika.

# Tito 2:11, 12

Nkaambo luzyalo lwa-Leza luleta lufutuko lwaboneka kubantu boonse, kuzootwiisya kuti tuleelede kukazya kasampusampu azisusi zibi zyaansi ano, tuleelede kukala cakulibatamika acakululama acakulemeka Leza muciindi ecino casunu.

### Ba-Efeso 5:11

Mutanooyanzani amilimo yabuyo yamumudima, pe, amwiiyubunune kumeso aabantu.

### 1 Johane 2:29

Kuti kamuzi kuti walo uliluleme, elyo mulizi kuti umwi aumwi uucita bululami ulizyedwe kulinguwe.

# 1 Johane 5:18

Tulizi kuti umwi aumwi uuzyedwe kuli-Leza tabisyi, pele Oyo iwakazyalwa kuli-Leza ulamubamba kabotu, kuti Mubi atamukumi.

#### 1 Petro 1:23

Nkaambo oko kuzyalululwa nkumuzyalulwidwe takweensi kwambuto iifwika, pe, nkwambuto iitafwiki, nkokuti makani aa-Leza maumi aakalilide.

#### Johane 3:3

Jesu wakavuwa kuti, Ncobeni ndakwaambila kasimpe, Muntu atazyalwa akuzyalwa kwakujulu, takonzya kubona Bwami bwa-Leza.

# Ezekieli 36:26

Njoomupa moyo mupya akubika muuya mupya mukati kanu. Njoogwisya moyo wabbwe mumibili yanu akumupa moyo wabuntu.

# 2 Ba-Korinto 5:17

Aboobo kuti muntu waba muli-Kristo, waba mulenge mupya. Zintu zikulukulu zyamaninina, zyoonse zyaba zipya.

# KUFWA KUCIBI — KUBUKA MULI KRISTO

### Ba-Kolose 3:1-3

Lino na mulibukide antoomwe a-Kristo, amuvwime zintu zyamujulu, nkukonya Kristo nkwabede, ulibombomene kujanza lyalulyo lya-Leza. Amupangike myoyo yanu kuzintu zili kujulu, mutaipangiki kuzintu zyaansi pe. Nkaambo mwakafwa, nkabela buumi bwanu bulisisidwe antoomwe a-Kristo muli-Leza.

# Ba-Efeso 2:1, 6

Lino anywebo wakamubusya, inywe nimwakafwide mundubizyo zyanu amuzibi zyanu... Wakatusumpwida antoomwe anguwe akutukazika toonse mumyeenya yamujulu muli-Kristo Jesu.

### Ba-Galativa 5:24

Lino abo ibakwe Kristo Jesu, nyama baliibambwide aciingano antoomwe aziciso zyayo azisusi zyayo.

### 1 Petro 2:24

Zibi zyesu wakazilemenenwa mumubili wakwe mwini acisamu, kuti tuzwe muzibi, tuponene bululami. Mibunda yakwe njiimuponya.

# Ba-Roma 6:2, 11

Swebo tufwidide zibi tukonzya buti kucikala mulinzizyo? . . . Mbubonya obo anywebo amuliyeeye mbuli bafwididwe zibi, pele baumi kuli-Leza muli-Kristo Jesu Mwami wesu. Johane 3:36

Oyo uusyoma Mwana nguuli abuumi ubutamani, pele oyo uutamvwi Mwana takooyoobona buumi, pele bukali bwa-Leza bulikede alinguwe.

Johane 5:24

Ncobeni ndamwaambila kasimpe, Oyo uumvwa ijwi lyangu, akumusyoma uwakandituma, uli abuumi ubutamani, alimwi takooyoosika kulubeteko, pele wakazwa kukufwa, waya kubuumi.

Johane 17:3

Mboobu buumi ubutamani, kuti bazibe nduwe, Leza mwinimwini, ooli olike, ayooyo ngookatuma, nguwenya Jesu Kristo.

Ba-Galativa 6:8

Oyo uubyala zintu zyanyama ulatebula bubozi buzwa kunyama, pele oyo uubyala zintu zyamuuya ulatebula buumi butamani buzwa ku-Muuya.

Ba-Roma 6:23

Nkaambo cakuvola cazibi ndufu, pele caabilo ca-Leza mbuumi butamani bwamuli-Kristo Jesu Mwami wesu.

Johane 3:14, 15

Alimwi mbubonya Musa mbwaakasumpula nzoka munkanda, mbubonya awalo Mwana a-Muntu ulyeelede kuyoosumpulwa, kuti muntu woonse uumusyoma abe abuumi ubutamani.

# KUSYOMEZEGWA LUFUTUKO

# 1 Johane 3:18, 19

Nobana bangu, luyando lwesu lutabi lwamajwi buyo niluba lwa-lulumi, lube lwamulimo alwalusinizyo. Mbuboobu mbutuzi kuti tuli basilusinizyo, alimwi tuzootontozya myoyo yesu kunembo lyakwe.

## Ba-Galatiya 4:6

Lino mbuli mbumuli bana, Leza wakatuma Muuya wa-Mwanaakwe mumyoyo yanu, uuompolola kuti, Abba, Ta.

# Johane 14:21

Oyo uujisi milao yangu, akwiibamba nguundiyanda. Awalo uundiyanda uyooyandwa Taata, amebo ndiyoomuyanda, ndiyoolitondezya kulinguwe.

### **Ba-Roma 8:16**

Muuya mwini ulazuminana amyuuya yesu tubeni kuti tuli bana ba-Leza.

# 1 Johane 4:13

Tulizi kuti tulakala mulinguwe, awalo ulakala mulindiswe, nkaambo wakatwaabila muuya wakwe.

### Isaya 32:17

Nkabela milimo yabululami iyooba luumuno, acilenge cabululami ciyooba luumuno alusyomo lutamani.

### Intembauzyo 16:11

Wandizibya inzila yabuumi; Kubusyu bwako kulizwide bukondwi; Kujanza lyako lyalulyo kulabotezya lyoonse.

#### Johane 17:13

Pele eno ndiza kulinduwe, alimwi makani aya ndaamba ansi, kuti babe akukondwa kwangu ukuzyulide mulimbabo.

# Ba-Galativa 2:20

Ndibambwidwe aciingano antoomwe a-Kristo, nkabela endime encipona, ngu-Kristo uundiponena mukati. Buumi bwanyama mbunjisi sunu mbwalusyomo, ndusyomo luli mu-Mwana a-Leza, nguwe wakandiyanda akulyaaba nkaambo kangu.

#### Isaya 12:3

Nkaambo kako muyooteka maanzi cakukondwa mumikalo yalufutuko.

# Johane 15:11

Ndamwaambila makani aya, kuti kubotelwa kwangu kube kulindinywe, akwalo kuti kubotelwa kwanu kukazyulile.

### Ba-Roma 14:17

Nkaambo Bwami bwa-Leza teensi makani aakulya akunywa pe, ngabululami aluumuno alutangalo lwamu-Muuya Uusalala.

# KUSWIILILA KU-MWAMI NKUBOTU

#### Deuteronomo 11:26-28a

Amubone! Buzuba obuno ndamubikila lulongezyo alutuko: nkokuti lulongezyo na mwaswiilila milazyo ya-Jehova Leza wanu njendamulailila buzuba obuno, alutuko na mwakaka kuswiilila milazyo ya-Jehova Leza wanu...

### 2 Ba-Tesalonika 1:7-9

Pele nywebo nomupenzegwa uyoomupa kulyookezya, antoomwe aswebo, kuciindi cakuyubunuka kwa-Mwami Jesu kuzwa kujulu. Uyooyubunuka antoomwe abaangelo bakwe basinguzu, abbalabala lyamulilo, nkabela uyoobwedezya muliyano kulibaabo abatamuzi Leza akutaswiilila Makani Mabotu aa-Mwami wesu Jesu. Aba bayoobetekelwa lunyonyooko lutamani kuzwa kubusyu bwa-Mwami akubulemu bwanguzu zyakwe.

# 1 Samuele 12:15

Pele kuti mwataswiilila mbwaamba Jehova akukaka majwi aa-Jehova, lino ijanza lya-Jehova lilamulemena mbuli mbulyakalemena hamausowanu.

#### Ba-Roma 6:16

Sa tamuzi kuti umwi aumwi ngumulyaabila kukuswiilila, muli bazike bayooyo ngumuswiilila, nikuba zibi zileta lufu, nikuba luswiililo luleta bululami.

# Ba-Filipi 2:11

Alimwi kuti indimi zvoonse zizumine kuti Jesu Kristo ngu-Mwami cakulemeka Leza Taateesu.

# Matavo 10:32, 33

Ncenambila kuti umwi aumwi uundizumina kubusyu bwabantu, ambebo nzoomuzumina kubusyu bwa-Taata uuli kujulu. Pele umwi aumwi uunditama kubusvu bwabantu, ambebo nzoomutama kubusyu bwa-Taata uuli kujulu.

# Ba-Roma 10:9, 10

Lyakuti, Anooli wazumina kumulomo kuti Jesu ngu-Mwami, akusyoma mumoyo wako kuti Leza wakamubusya kubafu, noti kafutuke. Nkaambo kumoyo kulasyomwa kuti kube bululami, akumulomo kulazuminwa kuti kube lufutuko.

### Luka 9:26

Nkaambo umwi umwi uundyuusa mebo amakani aangu, awalo Mwana a-Muntu uyoomuusa, aakuboola mubulemu bwakwe abwa-Wisi abwabaangelo bakwe abasalala.

# 1 Johane 2:23

Ovu uutama Mwana, nguwenya uutajisi Taata, pele oyo uuzuminina Mwana nguwenya uujisi Taata alakwe.

### 2 Ba-Tesalonika 2:9

Oyu sikusotoka milao uyooza akubeleka kwa-Saatani, anguzu zyamisyobo misyobo azitondezyo aziyoosyo zyakubeja.

#### Incito 26:18

Kuti ukajule meso aabo, basanduke kuzwa mukusia, baye mukusalala, akuzwa mubwami bwa-Saatani kuya kuli-Leza, kuti bajane kujatilwa kwazibi alukono akati kabaabo abasalazigwa kukusyoma ndime.

### Ba-Efeso 6:11

Amusame zilwanyo zyoonse zya-Leza, kuti mukonzye kwiima mumeneeno aa-Diabolosi.

#### 1 Petro 5:8

Amulibatamike akucenjela, nkaambo sinkondonyoko Saatani uleendeenda mbuli syuumbwa wabutambo akuya buyandaula ngwati lume.

## Matayo 4:1, 10, 11

Lino Jesu wakeenzegwa a-Muuya munkanda kuti akasunkwe Diabolosi. . . Lino Jesu wakamwaambila kuti, Koya, uwe Saatani, nkaambo kulilembedwe kuti, Nguwe Jehova Leza wako ngoelede kukomba, Nguwenya alike ngoelede kumanina milimo Mpawo Diabolosi wakamusia, nkabela elyo kwakasika baangelo, bakamukutaukila.

### Ba-Hebrayo 2:14

Eno mbubonya bana mbobaabilwa mubili abulowa, awalo mwini mbubonya wakasangana, kuti kukufwa kwakwe akamwaye oyo uujisi nguzu zyalufu, nkokuti Saatani.

### 1 Johane 3:8

Oyo uucita zibi nguwa-Saatani, nkaambo Saatani wakabisya kuzwa kumatalikilo. Nkabela kaambo nkaakayubunwidwa Mwana a-Leza nkaaka, kuti ajaye milimo ya-Saatani.

### Ba-Roma 8:35, 37

Nguni uukonzya kutwaandaanya kuluyando lwa-Kristo? Sa mapenzi naaba mapakasyo naaba mafwabi niiba inzala niciba cintanda nibuba bulowe niliba isumo? ... Pele mumakani aya oonse tulazunda cakwiinda nkaambo kayooyo uutuyanda.

# 2 Ba-Tesalonika 2:8

Elyo nayooyubununwa sikusotoka milao, ngwayoonyonyoona Mwami Jesu a-Muuya wamulomo wakwe, akumulobya akulibonya kwakuboola kwakwe.

#### Jakobo 4:7, 8a

Eno amulibombye kuli-Leza. Amumukazye Saatani, uyoomucija. Amuswenenene kuli-Leza, elyo alakwe ulamuswenenena...

## LUYANDO LWABUSICIYA

#### 1 Johane 4:20

Na muntu wati, Ndamuyanda Leza, nekubaboobo ulasula mweenzinyina, oyo mubeji. Nkaambo oyo uutayandi mweenzinyina ngwabwene takonzyi kuyanda Leza ngwatanabwene.

## Johane 13:35

Kuliceeci bantu boonse bayoomuziba, kuti muli basikwiiya bangu, mwanooyandana umwi amweenzinyina.

# Ba-Galatiya 5:22, 23a

Pele micelo ya-Muuya njeeyi:
—luyandano, lukondo, luumuno,
busicamba, buuya, bubotu, lusyomo, lubombo, kulyeendelela.

#### 1 Johane 3:14

Tulizi kuti twakainda kuzwa kulufu akunjila mubuumi, nkaambo tulayanda beenzuma. Umwi aumwi uutayandi mweenzinyina ulakalilila mulufu.

## 1 Ba-Korinto 13:1

Nikuba kuti ndaamba myaambo yabantu niiba yabaangelo, nekubaboobo nsijisi luyandisyo mumoyo wangu, elyo ndaba mbuli mulangu uulila buyo nanka cizyano cicokola-cokola.

## 1 Johane 5:3

Oku nkokuyanda Leza, kuti twabamba milazyo yakwe, alimwi milazyo yakwe tiili miyumu.

### Johane 20:26b-28

...Jesu wakasika imilyango neyakajedwe, waima akati kabo wati, Amube aluumuno. Mpoonya waambila Tomaso kuti, Tambika munwe wako, ubone maanza aangu. Tambika ijanza lyako, ulibike mulubazu lwangu. Utabi muntu uutasyomi, pele uusyoma. Tomaso wakamuvuwa kuti, Omwami wangu, Leza wangu.

## Incito 10:39-41

Aswebo tuli bakamboni bazintu zyoonse nzyaakacita mucisi caba-Juda amu-Jerusalemu, ngobakajaya, bamwaanzika acisamu. Oyo, Leza wakamubusya kubuzuba bwatatu, wakamutondezya kubantu, takuli kubantu boonse pe, pele kulibakamboni abakasalidwe Leza, kulindiswe totwakali kulya akunywa awalo kabukide kale kubafu.

### Marko 16:9

Lino naakabuka cifumofumo kubuzuba butaanzi ilimana Sabata, wakataanguna kupompa kuli-Mariya mu-Magadala, nguwenya ngwaakatandila badaimona bali musanu ababili.

#### Ba-Roma 4:25

Nguwe wakaabwa nkaambo kamilandu yesu, nkabela wakabusigwa kuti tukalulamikwe.

#### Matavo 16:21

Kuzwa kuciindi eco nciconya Jesu wakasaanguna kutondezya basikwiiya bakwe kuti uleelede kuya ku-Jerusalemu akuciswa loko kubapati akubapatiz basimutwe akubalembi, akujayigwa, akubuka kubuzuba bwatatu.

#### Ba-Roma 6:3-5

Sa tamuzi kuti toonse nitwakabapatizigwa muli-Jesu Kristo twakabapatizigwa mulufu lwakwe. Aboobo twakazikwa awe mukubapatizigwa kwamulufu, kuti mbuli Kristo mbwaakabusigwa kuzwa kubafu kubulemu bwabawisi, mbubonya obo aswebo tukeende mubuumi bupya. Nkaambo kuti twaba bagumene awe mucikozyano calufu lwakwe, elyo tuzooba awe mububuke bwakwe ahwalo.

## Johane 5:25, 28, 29

Ncobeni ndamwaambila kasimpe, Ciindi cilasika, ncencico cino, abafwide nobayoomvwa ijwi lya-Mwana a-Leza, abalo abalimwa bayoopona. . . Mutagambwi aliyeeyi nkani, nkaambo ciindi ciyoosika ncobati kamvwe ijwi lyakwe boonse abali muzyuumbwe, bayoozwa mpoonya, abo abakacita kabotu bayoobusigwa kubuumi, abaabo abakacita bubi bayoobusigwa kukubetekwa.

#### 1 Petro 1:15

Pele mbuli mbwasalala oyo uwakamwiita, anywebo nobeni amusalale mukweenda kwanu koonse.

### 2 Ba-Korinto 7:1

Lino nubayandiki, mbuli mbutujisi zisyomezyo ezi, atulisonzole busofwaazi boonse nibuba bwamubili nibuba bwamoyo, atulondole busalazi bwesu cakuyoowa Leza.

### 2 Timoteo 2:21

Eno kuti muntu walisalazya kuliyeeyi, inga ulabaanga mutiba wabulemu, uusalazidwe, uuelede kubelesegwa kulimukamwini, uubambilidwe ku milimo mibotu yoonse.

#### 1 Petro 1:2

Nomwakasalwa kumakankilo kubukanze bwa-Leza Taateesu akusalazigwa kunguzu zya-Muuya Uusalala, kuti mumuswiililisye Jesu Kristo akusansailwa kubulowa bwakwe. Amuvuzizigwe luzyalo aluumuno.

## Luka 1:74, 75

Kutupa kuti, mbotwaangululwa kumaanza aabasinkondoma, Tumukombe cakutayoowa mukusalala amubululami Kumbele lyakwe mazuba esu oonse.

## KUSALALA KU-MWAMI

Isava 35:8

Nkabela nkukonya oko kuyooba mugwagwa anzila. Iyootegwa Inzila yabusalazi. Mulinjiyo tamukooyooinda basofweede, pele iyooba yabantu bakwe. Sinyenda abafubafuba tabakooyooleya mulinjiyo.

### Ba-Hebravo 13:12

Eno awalo Jesu wakafwida anze lyamulyango, kuti asalazye bantu boonse kubulowa bwakwe mwini.

#### 1 Johane 1:9

Kuti twalyaamba zibi zyesu, walo ulasyomeka akululama, ulatulekelela zibi zyesu akutusalazizya zitaluleme zyoonse.

## Matayo 3:11

Ime ndamubapatizya mumaanzi, kuti mweempwe, pele oyo uuza musule lyangu uli anguzu kwiinda ndime, nkabela mebo nsyeelede nikuba kuyumuna indyasyo zyakwe. Oyu uzoomubapatizya mu-Muuya Uusalala amumulilo.

#### Ba-Efeso 1:4

Mbubonya mbuli mbwaakatusala mulinguwe kuzwa kumatalikilo aanyika, kuti tusalale, tutabi akampenda nikaba komwe kumeso aakwe.

#### Incito 4:31

Lino nobakamana kukomba. cibunganino cabo cakazungaanizigwa, elyo boonse bakazuzigwa Muuya Uusalala, nkabela bakatalika kwaamba makani aa-Leza akaanzambwene.

### Ba-Roma 8:9

Pele nywebo tamuli basinyama. muli basimuuya, nkukuti Muuya wa-Leza nuumukalilide mukati. Umwi uutajisi Muuva wa-Kristo, ovu teensi wakwe pe.

## Incito 11:24

Nkaambo wakali muntu mubotu, uuzywide Muuya Uusalala alusyomo. Elvo kwakayungizigwa bantu banjibanji ku-Mwami.

#### Ezekieli 36:27

Nioobika Muuva wangu mukati kanu akucita kuti mweende mumilazyo yangu akubamba imbeta zvangu.

## Luka 11:13

Nywebo, nobabi, mbomuzi kupa bana banu zintu zibotu, Usowanu uuli kuiulu sena takooindilila kubapa Muuva Uusalala abakumbila kulinguwe?

### Incito 13:52

Basikwiiya bakazyula kubotelwa a-Muuva Uusalala.

### Incito 1:8a

Kwalo muyootambula nguzu, wasika alindinywe Muuya Uusalala. . .

# KUSYOMEZEGWA KUGAMBYA KUBANA KRISTO 43

#### Intembauzyo 34:18

Jehova uli afwaafwi kubawizukide mumoyo, Ulafutula batete myuuya.

## Intembauzyo 37:3

Syoma Jehova akucita kabotu, Aboobo ulakala munyika akweembelwa kabotu.

### 1 Petro 4:12, 13

Nomuyandwa mutagambi aamasukusyo aayaka mbuli mulilo aamusikila kuti musukusigwe ngao. Mutayeeyi kuti mwasikilwa cintu ceenzu, pe, nkaambo mwaba banenzinyina Kristo, aboobo muleelede kukondwa, kuti mukakondwe akusekelela kuciindi eco acalo ncibuyooyubununwa bulemu bwakwe.

### Civubunuzyo 21:4

Nkabela uyoosindula misozi yoonse kumeso aabo, takukoovooba limbi lufu, nikuba kuomoka nikuba kulila nikuba kuciswa. nkaambo zintu zyakale zyamaninina.

### Isaya 66:2

Nkaambo zintu ezi zvoonse, ijanza lyangu ndelyakazilenga, zyoonse nzezyangu, mbwaamba Jehova. Pele muntu ngunzoolemeka ngooyu: kufumbwa uulipenzva akulibombya mumoyo, uukankama kumajwi aangu.

Intembauzyo 34:19

Mapenzi aamululami manji loko, Pele Jehova ulamuvuna kuli oonse buyo.

Ba-Hebravo 2:18

Awalo mbubonya mbwaakalimvwida mwini kusunkwa akupenga, ncobeni inga ulakonzva kubagwasya abo abasunkwa.

Ba-Roma 16:20

Lino kaba kaindi buyo, Leza siluumuno ulamulyataulila Saatani kunsi lyamaulu aanu.

Isaya 43:2

Ciindi noinda akati kamaanzi. njooba ayebo. Noinda akati kamilonga, tiikooyookutola. Noenda

mukati kamulilo, tokooyoopya pe, amabangabanga taakooyookutenta.

Ba-Roma 8:28

Pele tulizi kuti kulibaabo bayanda Leza, nkukuti kulibaabo baitidwe mbuli bukanze bwakwe. ulabeleka abo kuti makani oonse ahote.

1 Ba-Korinto 10:13

Taakwe lutepauzyo lumusikila cita mbuli matepauzyo ngibajana bantu lyoonse, alimwi Leza wasvomeka, ikuti takoozoozumina kuti mutepaulwe kwiinda inguzu zyanu, pele antoomwe alutepauzyo ulacita cipolelo, kuti mukabe alukolelo.

## KUSYOMEZEGWA KUBAZUNDI

## Ciyubunuzyo 3:5

Oyo uuzunda uyoosamikwa zikobela zituba, nsikooyoolizimaanya izina lyakwe mubbuku lyabuumi, pele njoolizumina izina lyakwe kubusyu bwa-Taata akubusyu bwabaangelo bakwe.

## Ciyubunuzyo 3:12

Oyo uuzunda njoomubika kuti abe musemu wamucikombelo ca-Leza wangu, atakazwi limbi anze, nkabela njoolemba alinguwe izina lya-Leza wangu, azina lyamunzi wa-Leza wangu, ngu-Jerusalemu mupya, uuti seluke kuzwa kujulu kuli-Leza wangu, alimwi njoolemba alinguwe izina lyangu lipya.

### Ciyubunuzyo 3:21

Oyo uuzunda njoomuzuminina kukala ambe acuuno cangu, mbubonya mbuli mbundakazunda ambebo, aboobo sunu ndikede a-Taata acuuno cakwe.

# Ciyubunuzyo 2:7

Oyo uujisi matwi, aswiilile Muuya ncaambila imbungano. Oyo uuzunda njoomupa kulya kumusamu wabuumi uuli mukati ka-Paradaiso wa-Leza.

### Ciyubunuzyo 21:7

Oyo uuzunda uzookona zintu ezi zyoonse. Njooba Leza wakwe, alakwe uyooba mwanaangu.

#### 1 Ba-Korinto 7:10, 11

Kulibaabo bakwete kale ndalailila boobo, nkabela teensi ndime endailila, ngu-Mwami. Mwanakazi teelede kulekana amulumaakwe. Kuti ulimulekede kale, uleelede kukala katakwetwe, nanka kuyanzana amulumaakwe. Alakwe mwaalumi teelede kuleka mukaakwe.

### Ba-Roma 7:2, 3

Nkaambo mwanakazi uukwetwe ulaangidwe ku-Mulao amulumaakwe nacipona, pele mulumi afwa, walubuka kumulumaakwe. Nkaambo kaako kuti waba amulumi umbi ciindi ncacipona mulumaakwe, elyo ulaambwa kuti

ngusibumambi, pele mulumaakwe afwa, elyo walubuka ku-Mulao, nkabela tali sibumambi pe, nikuba kuti waba amulumi umbi.

## Matayo 5:32

Pele mebo ndamwaambila kuti, umwi aumwi uuleka mukaakwe, nkutaamba kuti nkaambo kakuvuula kuliumbi, wamucitya bumambi. Nkabela umwi aumwi uukwata oyo mwanakazi uulekedwe wamucitya bumambi.

#### Luka 16:18

Muntu umwi umwi uuleka mukaintu wakwe, akwata umbi, waba simamambi, awalo uukwata uwalekwa mwaalumi, waba simamambi.

## KUBOOLA KWABILI KWA KRISTO

## Ciyubunuzyo 3:11

Njoofwambaana kuboola. Jatisya eco ncojisi, kuti kutabi muntu naba omwe uuti kunyanzye musini wako.

### Marko 8:38

Nkaambo umwi aumwi uundyuusila bweeme, mebo amajwi aangu, akati kabasyaasunu basibumambi basizibi, alakwe Mwana a-Muntu uyoomuusya bweeme oyo muntu ciindi ncati boole mubulemu bwawisi antoomwe abaangelo basalala.

#### Jakobo 5:8

Anywebo amukazike myoyo yanu, amuliyumye, nkaambo kuboola kwa-Mwami kuli afwaafwi.

#### Johane 14:3

Kuti na ndainka kuyoomubambila busena ndiyooboola alimwi, nzoomutolelele, kuti oko nkwembebe anywebo mukabe nkuko.

## **Matayo 24:27**

Nkaambo mbuli lulabo luzwa kujwe akusikila kumbo, mbubonya obo mbukuzooba kuboola kwa-Mwana a-Muntu.

### Matayo 24:30

Lino kuyooboneka citondezyo ca-Mwana a-Muntu kujulu, mpawo misyobo yoonse yaansi iyoolila, nkabela bayoobona Mwana a-Muntu uuboola amayoba aakujulu anguzu abulemu bupati.

#### Luka 21:27

Nkabela elyo bayoobona Mwana a-Muntu ulaseluka mukumbi, enguzu abulemu bupati.

## Luka 12:40

Amukalibambe anywebo, nkaambo Mwana a-Muntu uyoosika kuciindi ncomutezi.

## Matayo 16:27

Nkaambo Mwana a-Muntu uzooboola mubulemu bwawisi abaangelo bakwe, elyo uzoobweedezya muntu umwi aumwi mbuli milimo yakwe.

#### Incito 1:11

Bati, Nywebo nobaalumi ba-Galilaya, mwiimvwinzi akulanga kujulu? Oyu Jesu uwatolwa kujulu uwazwa kulindinywe, uyooboola mbubonya mbomwamubona ulaya kujulu.

#### 1 Johane 3:2

Nobayandwa, lino tuli bana ba-Leza, alimwi takuna kuyubununwa mbutuzooba, pele tulizi kuti nazoolibonya tuzooba mbuli nguwe, nkaambo tuzoomubona mbuli mbwabede.

## Ciyubunuzyo 16:15

Amubone, ndaboola mbuli mubbi. Uli acoolwe oyo uulangilila akubamba zyakusama zyakwe, kuti ataendi acinswe akubonwa kuusa kwakwe.

# IJWI LYA-LEZA

Lino Jesu wakabavwiila, wakati, Mwalyeena. Tamuzi magwalo niziba inguzu zya-Leza.

-Matayo 22:29

Majwi aako ndaayobola mumoyo wangu, Kuti ntakubisizyi. -Intembauzyo 119:11

ljwi lyako ndilampi kuzituta zyangu, Lilamunikila inzila yangu. –Intembauzyo 119:105

Muuya nguupa buumi, mubili ngwabuyo, majwi ngendakamwaa-

mbila muuya, mbuumi. -Johane 6:63

Mutayungizizyi cintu nekuba kugwisya cintu, kumakani ngendamulailila, kuti mubambe malailile aa-Jehova Leza wanu ngemulailila. —Deuteronomo 4:2

Magwalo aya oonse akazwa kuli-Leza, alikondede kukufundisya akukulaya, akukuolola akukupandulula makani aabululami. –2 Timoteo 3:16

Nkaambo teensi luyando lwamuntu lwakaleta businsimi kalekale, pe, pele bantu ba-Leza bakaamba mbobakasungulwa Muuya wa-Leza. –2 Petro 1:21

Kuyoomaninina julu enyika, kwalo majwi aangu taakooyoomana. -Luka 21:33 Text reprinted from the Bible in Tonga by permission of United Bible Societies Africa Regional Centre, Nairobi, Kenya.

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English or visit www.wmpress.org.

World Missionary Press, Inc. P.O. Box 120 New Paris, IN 46553-0120 USA

9-15 108 Tonga HFA